

Politico Gerlien Croes ta insinua su partido politico nobo: TUR



For di dialuna ultimo, parlamentario independiente Gerlien Croes a hala atencion usando e hashtag #TransparenciaUnionyRespet, TUR.

E mesun dia, Croes a post simplemente e palabra TUR riba su pagina di Facebook, cu un fondo color berde-

blauw. Esaki a hala atencion di su siguidornan, cu mesora a cuminsa puntra e parlamentario si TUR ta bira su partido politico nobo. Asina mes, e no a duna mas informacion.

Te cu ayera, unda el a post riba su rednan social, y a manda via e-mail pa medio-

nan di comunicacion, un invitacion pa diadomingo awo. “Invitacion na boso TUR!” el a skirbi, hunto cu e mesun hashtag, cual ta insinua cu su partido lo hiba e nomber di Transparencia, Union y Respet.

Un di su siguidornan, deseando e hoben politico exito, a comenta cu “ta tuma hopi curashi pa dicidi pa bay pa e stap aki.”

Por recorda cu mei di aña 2023, Gerlien Croes a retira di partido AVP pa keda como un parlamentario independiente. E tempo aya, Croes a manda un carta dirigi na lider di e partido aki, Mike Eman, unda el a informa di su retiro treciendo varios punto dilanti, manera e diferencia di pensamentonan y sentimentonan entre esnan mas hoben y otro coleganan.

Croes a bisa cu el a uni su mes como candidato oficial di partido AVP “cu expectativa- nan halto y cu hopi animo pa sirbi nos pais cu e compromiso di partido pa rehubenece e

organizacion y crea un espacio y plataforma pa e voz di un generacion nobo den politica na Aruba.” Sinembargo, el a bisa cu “e cambio aki no a refleha manera nos a pensa y spera durante e presentacion di lista di candidatura pa eleccion 2017; e resultado di votonan a muestra diferente y na favor di e hobennan.”

Croes a bisa e tempo aya cu cu tempo el a bin reconoce cu e diferencia di pensamentonan y sentimentonan entre esnan mas hoben y otro coleganan tabata creciendo y cu el a encarga su mes di vocifera esaki continuamente cu e unico meta “pa partido laga los di custumber y refleha cambianan real pa modernisa formanan di hiba politica na bienestar di pueblo y Aruba su futuro.”

Pero e diferencianan den e organizacion pa pensamiento y opinion a keda haciendo e situacion no solamente mas complica sino tambe “frustrante” pa su funcionamiento den partido y fraccion. Incidentenan manera e situacion

cu a presenta den Parlamento pa e caso di parlamentario Mike de Meza y ex-minister di partido MEP Eddie Briesen, ademas di e partijbijeenco- omst di 17 di april 2023, mas diferencianan di opinion pa loke ta trata integridad a culmina un etapa unda hasta a cuestiona y ataca su principionan, manera el a sigura.

“Despues di deliberacion, lamentablemente mi persona no a keda convenci cu realmente e cambianan aki lo tuma luga, pa tal motibo mi a yega na e conclusion cu no ta keda na mi persona otro alternativa di distancia mi mes di partido AVP entregando mi retiro, considerando cu mi no ta reconoce mi mes den e vision y forma di pensa y hiba politica di partido. Lo mi continua cu mi contribucion den politica pa e bienestar y porvenir di pais Aruba y henter comunidad en general.” Cu su retiro, partido AVP a keda cu cinco asiento den parlamento, despues di retiro di Rycond Santos do Nascimento, pa motibonan similar.

Diferente partido nobo ta prepara pa proximo eleccion



Cu eleccion adelanta pa dia 6 di december proximo, politiconan cu tabata preparando pa 2025 awo ta haya nan mes mester agilisa nan presentacion y drenta inmediatamente den campaña politico, pa maximisa nan impacto den eleccion.

Otmar Oduber – Plataforma Pais

Maske e ta involucra ainda den caso Flamingo – acusa di irregularidad den otorgamento di tereno – ex-minister Otmar Oduber tin un tempo caba promoviendo Plataforma Pais. No ta conoci mucho detaye di Plataforma Pais, si tin mas miembro, si lo postula pa eleccion, etc. Caso Flamingo ta bin dilanti hues na november, y Oduber a bisa cu e ta spera cu e caso lo keda cla dia 2 di december. Esaki no ta laga mucho espacio pa campaña, y e mancha di un acusacion penal den caso Flamingo, cual tabata famoso pa e caso di “spookambtenaar”, lo ta afecta imagen di e politico.

Rycond do Nascimento – Lucha pa Reforma



Ex-miembro di AVP, parlamentario independiente Rycond do Nascimento a bandona AVP na 2023, y na augustus di e aña ey a anuncia su partido nobo: Lucha pa Reforma. Durante e anuncio, Santos Do Nascimento a bisa cu tin e intencion ta pa reforma e aparato gubernamental, cuminsando cu Parlamento. E no a duna indicacion si e mes ta bay ta lider, con grandi e partido ta bay ta, ni tampoco a menciona ken e otro miembronan potencialmente lo ta.

Di e nomber, Lucha Pa Reforma, el a bisa cu e ta “hopi cerca di mi curason.” “Tres aña pasa mi a hasta busca e domain name pa un website cu e nomber aki, y esey a bira tambe e nomber pa e partido, Lucha Pa Reforma.”

Tocante e cantidad di miembro den e partido, el a bisa: “Pa cuminsa ora bo bay notario bo no por lanta un partido bo so. Nos a opta si pa mantene e grupo cu ta firma na notario chikito, pero nos a tuma varios paso pa lanta e partido, y mi ta sinti contento cu e decision.”

Di loke ta diferencia su persona for di e otro parti-



donan cu tin actualmente, Santos Do Nascimento a bisa cu esey ta “mi posicion pa cu matrimonio, unda cu e mayoria di partido na Aruba ta promatrimonio homosexual. Ami ta vocifera cu mi ta contra, y esey ta haci cu mi mester wak un otro opcion, y e ora mi no ta wak un otro manera miho cu un plataforma diferente.”

Leonardo Figaroa – Partido Direccion Politea

Hoben Leonardo Figaroa, kende ta campanando riba e plataforma di “caba cu populismo”, tin algun tempo caba perfilando su partido, Direccion Politea, pa eleccion. Maske el a expresa di no tin wowo riba un posicion como minister den gobierno, el a pone como meta pa drenta Parlamento unda e por tin un influencia.

Maske Figaroa tabata post regularmente riba su pagina di Facebook diferente opinion politico, tabata augustus 2023 cu el a cuminsa oficialmente su carera como politico. E tempo aya, el a bisa: “Nos ta sali cu pasonan firme y positivo. Ami kier Zaken Kabinet como un solucion real ban dialoga!!”